

陶

山

詩

錄

陶山詩錄卷十七

善化

唐仲經

歸雲出岫集

丙子二月

舟抵袁江

新正遄發江之東江頭日日西南風距家咫尺不得通
舍舟登陸無從容楸軒書閣暖雲烘未及十日仍飄蓬
兒病方劇行念念邗江舊館未過從秦郵風阻北征鴻
今朝忽有快飈逢淮黃分合思神工憶昔雲潭走蛟龍
神樓官廨飛半空小民墊隘大吏窮年來底定誰之功
往來二十四年中觸目往事勞心胸

旅病雜感六首

吾病吾師保可敬不可親往時宦興濃閉閣常嘖呻圭
組旣得解藥裹已生塵浮名見獵喜沉疴抵隙臻引病
病如僞起病病反真病與官爲讐此意良足珍如何嬰
世網垂老忘其身

少小依膝前有嗽上氣疾徹夜不能寐慈親輒呵叱因
之噤作聲亦得稍寧謚今年六十餘夜欬如昔日左右
起旁皇誰敢轉相詰欬豈禁能止暫止亦何益迴思呵
禁人淚下長銜恤

春鳩曉呼雨雨勢閣不下化爲一尺雪三日堆於瓦宿

麥期澍濡無雨雪亦且唯有怯寒人擁鑪病浙灑冰雪
本嚴凝不爲春融冶因思雨露恩和氣蒸四野

旅館苦偏側湫隘兼煩囂平人尚當病病者安能調羣
謀遷厥居空屋誅蓬蒿行散傍階除好鳥鳴咬咬人生
亦逆旅安得堂堂常高何如居廣居寬狹隨所遭

故人鄴中令

謂趙渭川罷安陽令寓此

罷歸此僑居藏書兼蓄酒文

讌相懽娛斯人逐逝水此屋償官逋人琴倏已邈隣笛
生長吁古有三不朽文字其緒餘可憐百年身疾病間
憂虞

小病亦自佳可以謝機事薄醉亦自適可以遣幽思假

寐非高眠塵夢亦少憇緩步以當車筋骨亦少勤病時頗清閒病已轉勞瘁譬如醒而狂不若日霑醉

節相以檢勘墾荒

奏畱江蘇以道銓補奉

俞旨恭述三首

入林原不密出岫更何心暮景催疲馬春風起倦禽除書需次淺薦剡受知深但恐焦桐質難期中瑟琴

計然初建策李克亦敷猷地盡揮鋤闢民宜借箸籌桑田分海若禾黍貸河侯寬大依

明詔輕租是遠謀

十千增課少尺一播

恩多吏貴鳩民善朝嚴虎政苛宦遊今老矣筋力柰衰
何惟有丹心耿輪誠荅泰和

送陳雲柯方伯遷蘇州二首

民力東南重在吳

詔從江左昇夷吾珽明六寸光常炤露潔三升味自腴
鴻漸羽儀由玉帳雉馴棠蔭自銅符春風煦物真天性
也被吹噓到朽株

千頃汪涵靜不波任他鼓浪竟如何山公啓事人倫鑒
蕭相陳情

上意和見說屏維遷陸海佇看節鉞壯山河追隨却羨
平江水澹浥衣香雨後荷

題劉瀚西泠聽雨圖兼送其應京兆舉

一樓烟景畫西泠携到江南倩客聽文酒恰逢周默雨
詩僧會指伍喬星六朝山色君能寫卅載湖光我舊經
此去東華踏香土秋風得意好揚舲

宴莫愁湖樓汎湖有作

莫愁湖畔水拍門莫愁湖外雨翻盆主人折簡湖樓上
客來雨止開清樽小暑時節風雷猛多少樓臺入溟滓
納涼雖無藕絲裙擊汰尚有瓜皮艇湖邊招手聞欸音

紅蓮白蓮飛水禽綃衣扣舷盪輕槳金縷度曲調素琴
菱花深處迷澗谷秧鍼出水黏天綠巖際人家半菰蘆
不教簫管亂鶯鶯青山對岸名清涼翠微亭影浸湖光
恐有人傳邀笛步不知誰是鬱金堂洛陽女子盧家婦
獨占此湖在人口勝朝曾屬異姓王魚租雁稅今何有
英雄兒女同浮漚千載才名剩此樓有樓不飲湖不遊
溪鳥笑人空白頭山雨又來天欲暮捨舟張蓋入城去
歸來清夢更邈然身在五湖湖上船

重至海州乘舊舩名鷗影者感而有作

昔吾與鷗狎一出盟已寒海上未忘機浩蕩誰能馴照

水愛其影製爲一葉扁乘之欲凌空直到三神山風輒
引之去淺挂鯢桓蟠重尋有鴻爪勇退非鳶肩轉瞬逾
一紀乘傳又經年影還落吾手鷗飛何處津感茲物猶
舊憐我跡已陳鳬翁似我貌汎汎豈不閒胡爲老風濤
致令鷗笑人

奉檄重至海州并贈師禹門刺史

亮采十二首

客歲曾衝海國寒今逢暑雨促征鞍我行幾度來時路
民怨無才去後官似有前緣重握手未能免俗又彈冠
多勞父老殷懃問觸熱長途體尚安

海塾河淤幾歲年漸消舄鹵作爰田輕徭薄賦

中朝聖度地居民大府賢鴻隙舊防黃鵠怨魚陂新漲
白鷗憐因人成事邀登進慚向窮閭計受廛

淮浦鹹池變綠疇農屯亭戶價爭售兵緣南晦喧都尉
吏向東傾笑督郵弓溯百年難合度潦深三尺未分溝
土均可息錐刀競讓畔成風在遠猷

入壩驚見陸生波舊政迴思闕誤多減則雖寬一麥地
浚渠猶廢六塘河沐通碩項來如許漣赴歸墟洩若何
太守度阡同召父定看提闕長田禾

東海蕭生品最崇地聯鄒魯有淳風匡劉經術傳應遠
吳富詞章體亦工先種桃花開石室好攀桂樹踏珠宮

近聞弦誦家家徧樓建魁匡氣脉通

老馬那堪說識塗齊來問訊引康衢枕流清暑風生竹
樽酒論文月在梧好客居停培子弟得民師帥鼓生徒
賓興嘉會招邀近曾喫紅綾一腐儒

甲子河成歲月賒秦東門闕有生涯作亭曾紀東坡筆
奉使今乘博望楂澤國桑田沉積潦山城蜃市上朝霞
近來薪米流通未添得橋邊十數家

校文場就講堂開造屋人還置傳來填館修垣延客使
決科發策聚英才篇成槐市催花雨宴設龍門燒尾雷
進揖諸生多舊識頓忘筋力已衰積

是日決科試士
月望行賓興禮

鷹游門泊島夷船懷遠

恩由守土宣郊子問官毛氏解

流求失風船有八品巡官毛朝玉頗知書文

翁興學舌人傳携來白墮香猶薄戴得黃冠服亦偏歸

去華風誇大口躬逢嘉宴拜堦前

夷船有酒名曰耐官戴黃冠餘皆椎髻

勾當營田踏澗騰海雲招我上峻嶒客都來赴銅魚約

老尚能騎鐵獺登頗喜規模新梵宇還思香火舊山僧

恍如昔日祈羣望雷雨秋生午夜燈

雲臺陳俊輒先歸

謂參戎陳雨峯

跨鶴相迎揖羽衣一路泉從

銀漢落半空山作錦屏圍雨餘攀磴捫青壁醉後和雲

宿翠微指點桑田沙島外十洲帆影到巖扉

山靈礪石待銘刊
蘸筆滄洲興自閒
澤草芒生橫海堰
禪房花發宿城山
天池南徙無休息
雲將東遊又往還
咫尺蓬壺風引去
成連他日滌塵顏

題弇榆山房九十兩卷詩

挽轡盱衡遠題牋
樹義高節嫻無觸
相滓瀝有醇醪不
着未籌子能拈
剛好豪名言兼實
理左券已先操

題錢梅谿護碑圖

牛斗無字將千年
父老尚說臨安錢
若非長興問道表
玉冊金券何能傳
爲質於吳紆國難
顧不能殺寧非天
諸將泣床授筭鑰
文臣置院工詩篇
易名克配衣錦廟

述德長聲辟邪阡是時中原正鼎沸賦歛猶勝嬰戈鋌
可憐表忠道士守何如敦本雲孫賢我讀昭諫大宗譜
富春哀侯爲始遷武肅考寬祖曰宙曾祖曰沛有官聯
乾化開平累封贈二十二世哀成編名字多未見經傳
然疑或恐爲杜田當時倘如功臣刻後代直追東漢前
文僖慶系魏公續根柢盛大瓜瓞綿君精分隸善論誤
曷弗尋訪金石鐫

題師禹門太守圖冊六首

聽楓圖二首

樹欲靜兮風不止風不止兮愁人子聞聲兮興愴况宦

遊兮先公履五鼎不如今三釜親幸奉嘗兮桐鄉民顧
舊民兮粉榆社布舊政兮甘棠春攝攝善搖兮風獵獵
獨坐傾耳兮如見其人化爲羽人兮跨雲鶴追謳思兮
揚清芬報提命兮展建樹達

天聽兮孚楓宸

我所思兮在橘洲違先隴兮紀再周我所思兮徬青嶽
鴟夷山兮望宰木宦楓江兮官爲家聽朝鼓兮往而復
晝丙舍兮齊與楚親在天涯兮兒海角天涯海角兮胡
不歸楚有子姝兮齊託誰少遊知足兮守墳墓矧衰朽
兮欲何爲我生之辰兮霜葉赤歎鑽火兮逐駒隙感斯

圖之聰聽今同盟歲寒於松柏

春雨渡江圖二首

春潮帶雨來翦江掛帆席空濛雙翠鬟疑見貌姑射

我與江有緣往來廿四載可憐作畫人不若金焦在

汪謂

浣雲

荻莊雅集圖

同年落落如晨星

詔科徵士多鴻冥金門

親試時務疏關西惟君策大廷仕者縣宰兼學博不仕
六品光門庭出身加民特希罕表閭養素尤潛扁君來

偶遘文酒讌七子賦詩同一亭是時樹幄圍衆綠已見
荷鏡涵空青荻芽雖短新雨足鷗眠未起閒雲停建安
君可當吳質竹林客或媿劉伶遙天有路誰挂席選佛
前緣今聚薄人生千里不相識科名聯譜如鵲鴿離多
會少得解后斯圖不作空伶俜圖者我之齊年友汪藻
詞筆畫通靈三年不見猶問訊頃聞化鶴傷飄零我懷
我友三歎息有酒如淮長獨醒

西溪泛舟圖

嘉慶十年歲乙丑高堰啓洩淮揚藪君時膺檄廣陵東
宣恩撫振載糧糗郡將伊公勸卹民識君有爲兼有守

是年閔雨余臥病文書急遽効奔走鹽漬田更亭戶爭
范隄閩閩解紛糾

朝廷恩波如水波百萬金活百萬口但恐官吏無實心
尤無良者或克掊淮陰沉蒿發帑多命余監察鹽與阜

謂鹽城阜寧

力疾屏騶操小舟檢覈不敢遺寡婦惟將冰蘖

率吏胥未信痾瘰同父母黃階地與白塗連問君盡心

學不負明年移拊崇州院替人善補前官咎羣議改海

生驚疑賴君鎮靜安田畝一從疏築來召公

謂今平成節相

頓使民生厚披圖痛定痛還思苦憶同舟皆面垢君貌

無如此圖真飢溺心情傳不朽

石室書院格木歌

吳剛日揮斧斧創隨手合格木當如丹桂精鋸痕宛然
噬而噓十五年前定方中初營石室開東閣降原陟巘
憑青鳥翦棘塗茨延白蓋屋學高人指扶疎市成博士
聽鞞鞞嘉樹蔭百弓喬柯抱三匝誰知修月勤翻嫌受
風颯妄思運斤截半株更擬安門啓左闕蛟虬螻略怒
盤擎血雨乍濺雷鼓磕匠人股栗走且僵觀者目眩神
先嗒霜鏑深流虹挂條黛皮立引霞補衲若非古木含
真靈竟使庸工得摧拉我觀地員篇載山之材再施有
艸兢薺雜其木乃格與杞同呼土中羽鹹魚潛鬱林城

下蟠青龍都洲浦中吠紫蛤南山大栲齊峭礫東海博
桑共歎飲此木襟山負海長輪囷閱世應經千伏臘張
忠文魏忠壯守土振振服韎韐乘潮禽寇藏艤艤據嶺
却敵布渠荅兩公相望屹棟梁大樹將軍助合沓淫雨
霾烟久沉淪拔地參天自騰踏今爲文木興弦歌喜見
菁莪効敷納葉懸蒼玉佩實入瑪瑙櫺櫺凝翠靄橫軒
窗采暎紅曦照几榻從此染汁趨瓊林斷無厄閨愁白
蠟我緣三宿戀秋根于役重遊曳水靱館迎舊月侵綠
苔闌倚晚颺襲烏匱彈琴輒舞應樂鸞書壁羣飛添硯
鴿

朝逢格被叨栽培學先格致謝尊嗜顧名思義亦楷模

况爾神奇衆靈逕試看梗枿杞梓皆孫枝品格高於慈

恩埏

書院之勗州人將建張魏二公祠故篇中及之

下雲臺山至龍窩蕩迴過大伊山陸行渡河遇雨

五首

上山躡層雲羣真笑吾老下山揖青童贈我長生草

名

還魂草東岳所產

如遊聚窟洲還望安期島

小舟汎輦蕩滌與潮波接蚊蠓多於梁鉞鋒透白疊水

卽晚泥孩但露雙眼睫

三盧語不定其名咿呀囁

海濱有咿盧呀盧囁盧三山

大伊山勢敞

望古懷殊尤楚有鍾離昧蜀有糜益州

昨以舟行水今以興行水舟可慎風波興難覓涯涘無
水又淖泥一步一顛趾

一月一渡河安得顏如渥照水當自驚却對河流濁欲
與魴鱖書且歌滄浪濯

八灘旅夜二首

宿痾秋漸劇薄冷夜先知小月窺簾入孤燈背帳垂才
衰多滯思心熱少眠時不遣蜻飛去海翁真我師

茅檐新卓地細雨著檐柔人在秋聲館風生木末樓驚
更枕上漏鷄聲海邊極明月烟波裏閒看戲水鷗

海上中秋

野館茅屋海中間
沙田暮色烟迴環
合成七寶修月戶
獨出萬頃雲梯關
疎雨薄雷水國氣
玉露金風秋士顏
何殊東萊城不夜
潮平無際隔塵寰

寒

海濱八月天氣涼
濕雲一夜飛冰霜
小亭搖風鸛鶴叫
平洲滴露蒹葭蒼
塵顏奔走近鮫室
隴首區分窮蟹莊
萬里黃河有歸宿
百年皓髮何蒼茫

百菊溪宮保輓詩

才大非爲難難於應時興
尤難結主知終始常兢兢
公

負不世才系本同江陵詞章爲珠璧敷奏爲準繩事理
握機括流品辨淄澠陳臬在鋤姦百戒由一懲巨斧解
體髀惡石破瘕癥及其秉節鉞三月江漢澄粵海有通
盜蛟鯨孰可醫公至設方畧翦除震威稜東南界重寄
河患方奔騰歸墟度宣洩夾岸雙隄增塞防凡四五剋
期如響應水衡金錢省赤子衽席登是誰之績歟至今
靖螭馮去年按伏莽數日如芟苒無漏無株連弭患於
未乘當其試盤錯閉閣神先凝靜如臥壑虎動如脫羈
鷹千鈞手獨挈一綫心還矜嫌怨非所惜艱險乃克承

幸逢

知人哲不受異己憎日余初入

覲垂詢語頻仍對如前所云

上喜信有微謂渠善任使吏治宜蒸蒸一旦騎箕尾

九重思股肱太醫與宿衛相望馳江滕公功旣舄奕公

子彌峻嶒年已臻耆壽爵更踰疑丞飾終有殊典榮哀

多美稱如公尚何憾繫我憾弗勝部民舊謳思師資長

服膺羣力爭自効非材豈同升唯夫子知我策後人不

能報公無他長凜凜懷春冰述詩本親炙靈爽其來憑

韓旭亭封翁輓詩三首

先生有道者餘事作詩人道以冲爲用詩緣淡更真家

傳林屋小

朝賜綵衣新扶杖經行處飄然一幅巾

本是逍遙叟應歸兜率宮達觀生作壙遊興老如童慶
拜引年後

恩優奉諱中諸生榮若此特爲義方崇

臯比曾布席薤本又當門二十三年久千秋一日論昨
承重九信屬識萬峰園豈意書猶滯無從接笑言

歲除感懷三首

一年幾日不川塗自悔歸雲出岫無歲暮役車歌蟋蟀
天寒急遽困騶駼聽人穿鼻行將老向我吹毛慎所趨

莫倚舊交三十載階前羣策笑迂儒

彤軒油幕擁簪筮欲獻芻蕘隔沓冥夔一足行原蹠蹕
臧三耳聽轉盯睜夥頤敢損陳王重視蔭難延趙孟靈
試看反脣相報速依稀昨日眼猶青

國士情懷守歲寒白雲蒼狗變無端笑聽漏盡銷沈易
羞語雷同苟得難西北高樓歌者苦東南半壁措之安
關心遊宦多年地不覺桃符又改觀

孫淵如邀同江左耆英會分韻得難字

丁丑

耆英肇自洛此會古所難古徒云尚齒今更藉承歡封
公八十九鹿鳴歌迴還餘皆六七十齊列羔鴈班我亦

有伯兄嬰鑠乘清閒會有父兄在子弟具杯盤胡陳鶴
出樊方焦鴻漸磐相與序賓俱相隨勸加餐五百八十
歲八人坐團藥新樓適落成高宴喜盤桓潞公舊堂額
移爲斯館顏樓上有大槐階前有崇蘭家庭多樂事常
覺歲月寬笑我迫遲暮尚弗辭粗官年如蛇赴壑官如
鮎上竿雖循狄盧例移文慙北山

次韻陳雲濤山長

希哲

耆英會並謝與胡蘭川太

守招飲道院

鳳皇臺上鳳池客高年高坐談經席人疑四五十許人
食桃欲數崑崙核三間屋繞九英梅六朝山趁一雙屐

車公入座便生歡。涪翁作詩如雜劇。孫登長嘯來蘇門。
盍簪舞綵稱間隙。我因儋豆先酌鄉君真。停飭能賦麥
正擬分題樓八詠。早輸得句縑三尺。揭來展卷當風晨。
想見撚髭吟月夕。妙參法界華嚴來。聲類天台金石擲。
是時迎夏開舫齋。特爲殿春築花宅。樓頭月射樹成丹。
池底水涵山倒碧。爭持芳牋作錦屏。絕勝精膳出香積。
况拈競病更新奇。笑余唐突空刻畫。乃知浣露含沖襟。
自覺餐霞飛玉舄。人生歲月易消磨。日以塵土填肝膈。
隨身美疢滋憂虞。入世浮名促衰白。昔賢解識榮非榮。
高尚齊圖適其適。履道坊邊集國幡。耆英堂上傾雲液。

至道九老追遺風睢陽五老懷往昔及時行樂將毋同
餘年豈歎不滿百此會江東事所稀遐蹤洛下神不隔
九旬珍從如父師三老齒序無推擇遠道秦伯末同盟
粗官唐子原破格承約主賓燕賦詩欣逢飲食需占易
折簡偏愛琳宮遊投轄不愁榆景迫仙厨若問有酒無
蒲饌我歌既醉亦

次胡蘭川太守耆英會飲字韻并謝招飲

岸已前登十五稔

題我登岸圖有句云岸已先登十五年

四體書法揮墨

藩里門安步可當車衙鼓無聞自甘寢胡杲元是第一

人引年却讓師先飲

謂孫書屏太翁

君雖不飲飲香名飲字詩

成字字審得酒中趣觀人酣參詩裏禪信天稟笑余強
飲猶鋪糟應官每飯常失飪羞隨新進語雷同仰企宿
耆聲藉甚古來此會皆名賢納祿還鄉畫屏錦若以逋
客廁其間恐非高蹈清斯品諸公迥異北山周三君亦
如東老沈會中孫太翁陳雲濤與蘭川淵如皆仕而退
居者家菊溪兄方甫參焦衢風皆未仕者
獨余當止未能休濫竽欲吹寒輒噤飲我仙液餐芝英
招飲日余
方變食琅篇真合玉版餒

攝山道中二首

籃筍輕穿綠樹行山邨一路曉風清忽聞管笛和檀板
布穀聲兼打麥聲

栖霞山下買輕舟問客欲從何處遊莫怪打頭風作惡
江山如此合勾留

題楊雪湖高士像

名執字碩父吳江人瞿忠宣殉難高士扶其櫬與孤以歸里

管鮑交情棄如土况逢顛沛在羈旅程嬰摯誼世所難
樂布英風舊相許先生曾受圯上書一試奇謀已磔鼠
桂林殘局同厓山雖不受官仍禦侮孤臣精血灑郊原
死友肝膽凌險阻毅魄還鄉遺雛活間關崎嶇感豺虎
歸來獨從赤松遊老去長爲鴻鵠舉昔吾試守欽徐公
謂侯齋展祠表墓豐碑樹
先生聖代逸民容江湖空山靈氣走風雨先生義俠足千古

豈惟高士傳當補不了了之何從容

先生又號
不了翁

瞻仰遺

圖欲起舞

雨中邀陳香谷方伯龔闇齋斌吉甫兩觀察遊石

湖次吉甫韻二首

煙雨冥濛靜不囂山英引客入清寥行厨艇子傳青楫
競渡鮫人卸絳綃乍艤舲脣携屐齒未登塏頂倚廊腰
憑看秧馬從橫出老瓦盆邊隔水招

行春橋畔踏春蕪十五年來別此湖陳迹鏡中添鶴髮
新詩席上贈驪珠朝端簪紱誰能拂江外犁鋤我欲扶
傑閣招涼堪入畫愛君先寫碧梧圖

擬作石湖雨泛圖
吉甫先寫照甚肖

哭彌甥張澤雲

我惟一姊長廿歲我曾受書從姊壻姊壻與姊皆考終
一子一孫無活計依我遊宦如我生延師同讀衣同製
甥通經學試不售弱息頗慮難長世爲買一妾期添丁
豈料中年已歎逝是時離孫方長成猶冀亢宗承緒系
吁嗟天道真難知爾之曾祖登甲第乃祖乃父傳書香
篤行豈特工文藝三十而夭爾何冤姊氏有子竟無繼
但餘曙後一星孤

彌甥僅存一妹裁十一歲

攬鏡撚髭空雪涕

題倉聖祠圖

文人報本禮新祠薦黍興懷雨粟時道啓狂榛同古聖

象觀蟲鳥亦吾師科條轉想繩初結憂患偏嫌字是孽
欲挽浮華歸樸簡開天一畫溯庖犧

勘吳淞江泊黃渡千秋橋二首時六十五初度

偶聞蟋蟀職思居慮事疏江寓目初小泊疑先驚宿鷺
此行悔不爲鱸魚黃華今日迎征棹白望頻年困役車
我與東南民力似雖勞敢弗奉官書

吏事奔波歲月流避人欲泛五湖舟檀弓未定還山例
伯樂難爲伏櫪謀不信造橋知頌禱何須問渡悟因由
黃渡東有一篙水淺行多滯却喜潮來足泳游

唐家渡

九日登上海神祠內石山

海上神山不可卽客中重九想攀陟是誰鞭石堆巖巖
許我躡屐凌巔劣黃浦千檣高插天五湖三泖流涓涓
不離城郭廓周覽置身已到塵寰巔秋光霞氣挾潮起
人在金銀宮闕裏馮夷擊鼓鶴舞雲醺酒當風半山紫
十二月二十有一日雪

屬城急遞報祥雪文書堆案細檢閱京江長淮積最多
平地尺餘猶截嶽一晴三日不肯消人言更作增栗烈
今當歲暮例休旬果見同雲又霏屑江南二三十年來
如此三白詫耆耄嗟余羸老怯深寒遮莫人情冷似鐵
却聞瑞兆大有年忍凍茹冰除內熱

祠竈感懷六首

置炊無定突設祭有清觴雖異因人熱敢云遷地良踞
觚容老子畱粥待兒郎却憶持家婦瓶盛春釀香

泛宅非吾土攝官尤客居廢餐惟案牘謀食少儲胥但
得嚴君佑寧勞媚子譽朝天知有路陳奏定何如

幸無遮眼煬不供膠去牙錫諱過我何敢原心君自明

由來崇五祀自合異三彭頗有疑難釋陳詞達玉京

人情不甚遠天道豈難知如何張氏姊竟乏鄧家兒三
世存孤女一經懷故師黔羸應有說覆載本無私

更憶岳宮保真爲飲水廉肅清羣吏化飢溺一身兼野

鶴栖荒壟寡妻依短檐

思綸與輿誦長使淚頻沾

廉吏尚如此況余疎嬾人豈期官入手却苦病纏身香
辦添鑪篆清齋拂甌塵那容呵壁問健飯感明神

次韻葉鼎新年篇

新年復新年年年盼尺一鵷猶戀朝隣鼠豈知堂密五
角六又張九事八爲律民憐蟲食辛吏愁虎挾乙司空
城旦書淮南萬畢術幸逢匡說詩欲令曾舍瑟受代思
牧之出遊憶長吉還看及時花不假斷事筆

鼎有金陵
看花之約

戊寅元旦二首

南斗瞻雲向紫微五更三點整朝衣歲當除日春先到
雪正晴時曉又霏舞蹈自知筋力弱謹呼預卜土膏肥
和風初拂林鳥散一路韶光上畫旂

公廷退食拜家昆願進屠蘇酒一尊同是得年無老少
幾時歸里共朝昏新炊藏甕冬春米細嚼堆盤生菜根
如此甌盆真煖熱底湏列炬戟爲門

蔡佇蘭孝廉見和元旦詩倒用前韻時病初起次
韻答之

爲怯春寒盡閉門長年肺病未除根難從坡老簪花勝
欲學稽康種合昏吹杖閣中傳好句落燈風裏引清尊

朗吟坐對盆梅發笑我山礬讓作昆

看看萸柳綠如旂郢樹冰肌瘦又肥
警枕不眠聽瓦雪
曉窗先起望林霏君於藥裏尋細帙
我向熏籠整繡衣
同是衰齡貧且病文書獨自檢精微

臬事將替樞紳以棠陰重憇顏於堂壘前韻

牘書金字燦臨門爲頌甘棠種有根
媿對堂階交揖讓
細窺題品拭眵昏三遷尚戀吳趨舊
五日難稱京兆尊
却愛此都人士美不關虎渡感劉昆

噦噦鸞聲筏筏旂瓜期恰趁鰕魚肥
頽年塵牘隨車蹇
快友清譚玉屑霏瑣闥追趨聯彩佩

詔科催送點朱衣羣公都是金門選笑我淹留望翠微

陶山詩錄卷十八

善化 唐仲冕 六枳

養筠謬集

自蘇假歸金陵四首

風送得替船一帆三百里雨洗休沐塵剛抵北山邸邸
舍非故園僑居逾一紀老樹四五株枝柯成連理手栽
百花卉應時綴芳藥院梅方大放迎我笑可喜相違歲
已遷相見情俱美花木尚欣欣候門況孫子卽此當還
鄉人生如寄耳

臘雪久且深盈尺兼表丈霑徧江南北大田兆豐穰如

何春漸至輒復大如掌我本號寒蟲欲蟄不得益乞假
當融和負暄任偃仰豈料雪仍作勢比臘更莽北枝壓
至地南榮封不敵天教吾閉門因之謝來往

故人同歲生同方亦同病舊約早還山君先遂溫清去
年會耆英隨君洗腆慶吾亦奉耄兄分題快風詠別後
遺我書勉以平反政深佩良友箴離居難合併豈知成
隔世古歡不可更今來唁若翁勸慰感天性自憾鮮民
生音容杳且覓

孫淵如易簣時深以未得終養
爲憾然視雙親早背者何如也

明知官繫匏無計得解脫三吳衣帶水咫尺千里闊攝
職理文書紛如雲難撥痼疾時發興類癭不能割故人

忽淹逝

謂李誼園觀察

良友又疎豁

謂方茶山廉訪

鄰笛不堪聞驛柳

幾時達於茲悟幽屏可以息爭奪花光照新晴檻外春

山活

輓孫通奉淵如二首

入懷淵耀照書樓中歲重親樂擁騶斷案引經真漢吏

訪碑行部徧齊州故山官暇時尋討小學年衰尚校讎

聞說平生頗得力神明不亂了浮休

茶山廉訪寄書所云時余權臬蘇州

廿載知交遠倍親曾籌買屋作比鄰石湖賓從推前輩

山館耆英奉老人問字今翻求宿德傳經後更付家珍

獨憐談藝開懷抱綠酒紅欄跡已陳

小院栽杏八年不花
今春花發甚繁
喜賦廿四韻
樹爲看花
植花應著
樹開如何
空葉茂幾
欲雜薪摧
歷歲同僵
李逢時若
放梅梢初
攢檻外枝
更出牆隈
春色行將
闌仙姿舊
已胎繁殊
披錦碎高
似倚雲栽
好向緇帷坐
無勞羯鼓
催且爲羣
卉殿聊解
衆人吟昨
惜輸凡豔
真甘處不
材園丁謀
勝嫁牧子
失村醅忽
喜緋衣賜
紛如紫袖
迴帶霞標
繡閣迎霽
照瓊臺莫
怪韶華晚
深叨雨露
培齊驚多
異采始信
匪麤才憶
昔軟紅路
頻嗟燒尾
杯一朝趨
曉漏十里
踏香埃上
苑遊難到
長安去幾
回韜光原
寂寂得志
自恢恢客
唱尚書宋
坊題宰相

裴馬蹏曾駐處蜨版乍飛來秀骨超金粉奇葩映綠苔
生仁猶待結重萼正成堆地近文梁館人爭藥榜魁日
邊占瑞靄芳種自蓬萊

爲蔡佇蘭題余秋室學士所畫馬

學士善畫承平馬顧視清高態嫺雅食禾當食玉山頭
飲水不飲長城下雖飽一石肉難肥能馳千里汗自赭
伏櫪豈爭牛宮卑追風尚庇圉師序或疑短馭非權奇
那識長鳴盡啗啞有朝得路歸天閑將老其材壯函夏
神超早籀海西雲氣逸全空冀北野赤墀迴立其誰乎
青絡橫行無健者孫陽未遇驪黃求曹霸獨擅丹青寫

蔡侯得此興飛騰唐子觀之筆傾瀉請君更看玉花驄
學士爲余所畫馬 一般神駿酒同把

謝繼蓮龕方伯惠山楂糕二首

釀成山果膩紅酣風味憐余素所諳微帶儒酸存本色
那輸崖蜜勝回甘擣殘渣滓功能化嘗徹中邊道可參
餽白粥香叨美餉英華何幸得咀含

釘坐堆盤映赤霞底須勾漏覓丹砂厨分櫻筍和糕餅
醬異桃梅沁齒牙消渴翠鬟顰不覺含飴鵜角語先譁
瓊膏本自蓬萊島錯認稱名是海查

本草查是星查俗呼山查子誤

杏子

八年不花花忽開
有負愛花人手栽
可憐花意尚未慙
空花那足酬
因材酬君以華
不如實感君相待
日復日
倘令鋤去同蕭稂
安得芳菲照堂室
花萼初胎便生人
枝頭綴子顆顆新
金剛拳垂宿雨重
火齊珠轉朝霞勻
采之登盤薦諸寢
歲星之精光豐稔
何必撞門繫紅裙
非徒置坊題碎錦
十年樹果無速效
得氣自爲栽培報
春雨江南盡歸乎
好鼓范蠡湖邊櫂

養筠謠二首

堂左有廊舍
十笏供宴坐
隙地圍短樊
幽居事清課
初栽梅一株
近放香滿座
計梅品同高
愛竹塵無浣
屋角

移三竿牆腰植兩个梢已干霄長筍欲穿徑過垣低謝
豹驚砌窄春駒墮衝蒙芽或枯遇石根先挫因思地勢
寬得受天光大隔援數弓收召工連日作既舒青鸞翔
還稱玉龍卧翠陰從此添苔痕不須破

竹高過房簷筍短迫牆腳偏側勢難容遷移規可拓雖

然廣尋丈頗覺開林薄謝暑壙自崇穿雲壁先鑿圓通

月度門方引水歸壑入夏纔抽萌迎風正解籜此竹本

名遲其材似差弱豈知竦浮筠直欲升碧落

遲竹生筍
稍遲而幹

最晚成當培養歲寒藉栖託舊列桂於堂合補松傍閣

人家美輪奐我意寄寥廓欲學元紫芝洞巖無局鑰

長兄新喪感劍姪次韻養筠謬詩再疊前韻卽以

示之 劍

簡書日奔馳親戚少團坐豈若田園居共事晴雨課樂
能聚同懷榮還勝八座况吾手足聯不受泥塗浼詎前
傷季指今又弱一个顧影子雁飛流光隙駒過三人各
瘦孱惟余更衰墮吾身反獨存此志乃先挫憶當泊宅
初非誇門第大酒喜弟兄酌詩命子姪作茲縱廣花圃
誰與偕醉卧開軒見竹苞難遣愁顏破

端憂勞肝肺出遊怯腰腳慰薦得阿咸襟抱自展拓因
之懷吾弟植根非淺薄少時若塤簋晚歲無杓斝方喜

雨連床遽駭舟移壑幸有孤竹材早含干雲籜露擢一枝秀風撼微條弱有筠知弗改不殖慮將落勵志徵諸詩析薪欣有託憐余傷在原望汝登快閣刀圭起痿痺健翮翔虛廓此屋何足言充閭啓管鑰

龍潭哭兄三首

入望僧樓擁壁門記曾捧手話鄉園枕衾小別纔三月風雨重來已九原詩憶龍鍾無限淚

兄永訣詩有兩袖龍鍾淚不乾

信

傳鶴語未歸魂百年同氣凋零盡身世憑誰共討論

對床相約遂初衣無奈勞生未息機諸子有家能肯構老夫無日不思歸嗟兄健尚孤松悴顧我衰同百草腓

到處追隨今隔世回頭樂事已全非

旅櫬江村痛奈何指秋返旆送虞歌

先人自昔留封

樹宗子終當正首禾却望慈雲藏岱麓合營生壙傍山

阿

先慈葬岱西冕當從葬

忍將此別成終古豈特餘年感逝波

三疊養筠謠二首韻荅釗姪

小園粗訖工側席難安坐未諳名家言輒司法曹課語
常對赭衣齋若參獅座蔬筍素所甘金粉嫌其浣每於
衙退後偏懷屋左个雖爲環堵居喜無高軒過糞除廬
有屬灌溉僮毋墮尤愛十竹成莫使一毫挫期君報平
安任人嘲措大積書巖自探修月戶能作雨淨西軒凭

風香北窗卧日對翠琅玕蕭齋寂可破

官如上風車無地可著腳材如挽强弩盡力不能拓世
路孟門險宦情秋雲薄電掃旣倥偬泥行又疏鑿升斗
貸監河尋友讓聳壑況居磨蝎宮直欲冠筍籜知幾慚
未退競爽嗟又弱隻影入畫圖關心此院落

近作養筠
謬行和子

蘋藻羣魚遊扶疏衆鳥託興不遠園林貌豈類臺閣生
與竹同瘦居嫌空太廓養身如養筠門關守金鑰

英煦齋太宰以其次子奎耀由侍講學士升少詹
事其長子奎煦卽陞侍講學士紀

恩詩見寄因次其韻賀之

榮經三世掌絲綸兄弟蟬聯寵更新拜侍上公前與後
對揚

天子聖而神鴻儀次序從班列燕翼光輝信夙因鼎盛
一門由濟美願將稷契共謀身

徐安桂畫竹易粟以濟窮乏詩以贈之

畫餅不充飢煮簞不能熟如何放筆爲直幹頓令蒙袂
來果腹吾聞花開如棗實如薺根葉枯朽懸青復是名
竹米兆三嘆難資口實同半菽或飼鵠雛大如卵或類
樹雞白如玉此皆未足周貧窮況以紙田生旅穀安槎
夙懷任卹風傾家莫辦黔敖粥貌出長身古君子化爲

大願老尊宿偶與西鄰謀一飽但將東絹揮數幅翠梢
初寫拂雲青茅簷已望炊烟綠大千同叅玉版禪萬个
那惜管城秃我無濟衆才久媿爲民牧卅載常堅歲寒
心五日又判霜臺牘囊錢臣朔笑侏儒坐輿子猷造空
屋近學魯公書難貸河侯粟歎飯豈解饒瘦骨徒醫俗
枵然甑有隔宿塵妙哉畫勝豐年玉便欲從君腕底乞
渭川坐擁千畝覓千斛

補棧館小照自題二首

假館閒庭讀小山雙株半已付榛菅遷移月窟丹柯影
補綴雲階碧蘚斑僊友定緣同氣合王孫當得幾時還

西河枉自勞揮斧本是瑶林第一班

補天尚鍊五華石修月應分連理根欲挽銀河澆伏暑
待開金粟照黃昏煙添晚翠橫三徑露浥秋巖共一垣
古幹新叢齊入畫坐中衣袂染香痕

題明方伯杜梅梁先生遺像二首

先生名喬林字君遷江南華亭

人

廉貞來斗極位業本仙曹直道匡君切奇謀殺賊豪名
原齊李固學自擅文韜引退騎箕尾招魂賦楚騷

香案非淪謫瑶臺舊侍臣

先生卒謚仙果爲元皇右局真君

鸞仍歸右

局鶴自認前身度海經三淺凌霞隔兩塵忠良遺像肅

卽此悟仙真

題沙塘祠屋圖二首

有序

沙塘祠屋者韓桂舫大司寇爲其七世祖明少宗伯
諱世能公修建者也先是嘉慶乙丑余爲吳令封公
旭亭先生以宗伯祠墓侵削告余謂前詒遺壘屬禁
樵采有司責也急釐正之越今十餘年來亦稍陵夷
矣大司寇方以憂歸爰繼志重修秩然完善且繪爲
圖以矢勿諼而屬余識之因繫以詩

世篤宗祊誼遺祠廢復興蟠根縈葛藟聚族奉嘗烝昔
指眠牛地今成下馬陵清芬常自誦攀陟憶扶藤

自吾爲邑長表墓分之宜修復憑宗衮褒嘉媿口碑孫
謀詒有穀祖德述於詩展盡看雲水人懷固本支

補授館閒課十六事自夏徂秋效少陵體

測晷

二萬六千日都隨漏轉銅稀聞報蚤莫頻驗景西東針
直信亭午晷長疑再中
小年度岑寂視蔭意無窮

貯霤

簪井不可汲天垂霖雨甘建瓴自高屋承霤輒盈甌澤
稼霑常膏烹茶酌不貪時淳同甕露浥注卽寒潭

移花

既補月中樹還移雨後花
夏畦勤灌溉秋圃愛清嘉
底事覓珍種惟期森翠芽
待霜釀紅紫雅不減春葩

芟草

生意雖滿眼當嚴非種鋤
良材豈易植滋蔓合先除
陳旂倩風埽新條和月梳
呼童剔秋繩去階砌羅清疎

作字

少小學執筆垂老猶未能
喜客穿門限憑人弔刻滕
別裁求古拙新樣重飛騰
撥鐙無參處常揮墨數升

整書

詩書無書讀書多反不觀
沉攜行篋少可任蠹魚殘觸

手若心喜開編先與闌却懷樓上帙寄語曝應乾

覘畫

畫史解盤礴旁觀意氣豪山分烟九點面寫頰三豪詩
意舉雲出禪心映月高移床避塵取坐卧得遊遨

憶游

龍門攬勝處午夢與之遙題筆岱衡頂挂帆江海潮丁
年時撰杖丙舍遠攀條游子歸猶未如聞隱士招

糝羹

江國足蓮芡天然風味清粉同礬玉糝淖勝絮藜羹芒
刺剝先盡苦心嘗自明涼生諸物老餐菊落秋英

丸藥

所須惟藥物其柰兩丸馳樹有流鶯囀庭無使婢疑圓
於脫手得香未入喉知難覓九還術翻求百草滋

涅髭

蹙蹙軟紅道緇塵化素衣髭雖加墨浣鬢未覺星稀蒲
柳秋先悴蒹葭露易晞人情多侮老聊以示衡機

雕相

相類東方先生

工操偃師技雕鏤亦傳神客喜作機巧吾甘爲木人無
鹽憑刻劃優孟假衣巾曼倩敢唐突先生同我真

刻耳

耳垢不能洗久之還聽熒聊瞢只自覺叮眸豈容停袞
若摘纖纊鏗疑撞寸莛雲閑呼欲出內景誦黃庭

搔足

曾行萬里路未濯萬里流胸臆患沉膈爬搔思決疣雖
殊無趾兀亦抱子春憂賴爾任奔走何當酬八騶

感葢

輕颼鼓蟲羽鳴曰叫哥哥有汝報秋急無兄如我何昨
同聽屋壁今獨倚庭柯回首湘山遠鷓鴣嘯更多

占鵲

鴻雁久不至頻煩端策占忽聞烏鵲喜霽色上風檐門

報嘉賓刺郵傳啓事籤吾當佩金印好爲發封鈴

六十六初度遊流水禪居二首

年華荏苒逐勞人欲向滄浪浣宿塵竹院迴臨秋水闊
茶簾齊話曉晴新長空鴻雁波先逝明日茱萸跡已陳
笑指方壺風引去憑軒倒影爲傳真

旋以迎謁制府登舟徑去

同是臨流況鼓橈唯亭曙色接江湖如何極浦橫烟艇
不及方塘對雨寮出世雲遊緣尚淺應官蓬轉老無聊
回頭欲問三生石隔水禪關掩碧霄

九月十四日

先君覽揆辰長兄生同物高堂昔洗腆隨肩拜簪紱一

自棄養來劬勞感蒿蔚猶賴家督存音徽未荒泐今年
失孔懷歸櫬已執紼天親邈難追子弟事永訖秋氣何
悽清秋懷倍怫鬱邱墓雲空懸田園草誰第設奠館庭
涼旅夢來髣髴

雞冠花有名百鳥朝王者繁麗絕倫吳雲士學博
有詩二首依韻酬之

牡丹富貴占春華對此應羞說麗葩揚采翩翩丹穴鳳
建標朵朵赤城霞似聞高蹈扶桑樹迥異低拈洗手花
無數錦枝圍一簇不誇朱草出金砂

百鳥來朝立四旁花名從俗見低昂獨看鶴頂能沖漢

却喜葵心盡向陽絳幘羣於秋著色瓊枝上與日爲章
新詩鸞鷟威儀美那許翰音天際翔

來詩改稱鳳冠花故云

補稷感懷三首

天壤無物無缺陷一一補之猶有憾取彼補此彼又缺
移新補舊新還欠此堂兩木缺其一於文爲困補之吉
豈知補後困彌加入於林中亦何益

新樹叢生山之幽山中愈老愈清適一朝移栽入城市
荒庭小院臨高樓遷其地已違其性且恐根株未堅定
祇爲古芳求伴侶強使疏材作後勁

老樹蒼蒼新樹綠小鳥營巢枝上宿老樹連蜥新樹長

雲深鳥倦夜雨足老樹作花少空枝新樹無花枝漸垂
幸保天年比松柏通聲接蔭無窮期

題吳孝廉

肅

計偕紀行詩

行役詩篇小雅才春明門外却空回披吟未竟襟先濕
憶我公車八上來

自題花甲重周第三圖

長兄長吾剛十年生日同逢菊秋天是年閒作選樓客
聞雁趣返江東船兄年七十有三矣康彊勝我羸疾纏
兒曹洗腆羅堂前弟勸兄酬詩句聯豈知詩中戒行役
語識總由志不堅無端復驅俗士駕兩載生朝未隨肩

附山詩集卷一
今春小別成永訣此圖欲再終無緣當時耽樂不目覺
後來追憶空潸然

次韻胡黃海學博

翔雲

三過補授館三值門人餽

饌畱飲見謝長句

定有人來餽鼎肉與君相視輒捧腹翻令引領日過臨
意外佳殽共飽足豈疑偵探鹿酒藏頗似前知椒薤熟
客本徑造無期會臺雖亟餽誰約束多緣知己幸邀徐
恰值美莊又添陸清譚不爨謝樵蘇越俎而代勞尸祝
祇須二簋可用享或遇三人奚待速重逢頻喜畫方興
暢敘何愁夜未卜君逞雄辯驚華筵時逐冶遊徵老福

顧我匏瓜憐久繫
欸客菜根誇臘馥
慷他人慨殊自慙
度君子心非所欲
健啖聊損束脩羊
高吟合舉花蠟燭
蓬萊清淺具行厨
君儻從吾泛海曲
金齏玉鱠不足言
同擘麟脯當首膾

陶山詩錄卷十九

善化 唐仲冕 六枳

吳淞江集

濬吳淞江先築禦潮壩

吳淞塞當開先防潮激射既築遏湖隄喫緊此東垣曾
聞雍正年大汎輒陵駕屢築不能成太守隨潮下至今
陳家渡周卿祀鄉蜡亦越乾隆中治河卒可借地近野
雞墩材資羣木架今空廿四丈萬金爲工價岸與新牖
鄰勢將重潮迂河卒或易之初合幾倒瀉壘以土堰關
加以金椎研培壘已三成澎湃始無罅當其措手時忽

若溝塍藉及知向若驚慎於呂梁跨蹄涔溢漕渠蟻穴
潰波滢疎畧患從生前車況嗟訝

次韻胡黃海遊上海李氏遂初園三首

遂初吾素願園定爲誰開泉石如心置烟霞拂面來舊
林增我憶新詠遲君裁知有清遊興前期預埽萊

前五日余

先往遊

好趁探潮便何愁濟勝難奇峯環水瀛古樹帶雲攢畫
稿倪黃澹詩材鮑謝寬撚髭尋洞壑幽窈不知寒

僅籬塵不入竹館朴無華到此思蓬島憐余算海砂佳

篇過日把小住隔年賒甚欲畱歸艇

時君將歸

高譚聽粲花

黃海倒疊前韻三首留別依韻贈行

先生原曠達雅不守蒿萊遊跡隨雲出吟牋信手裁却
纔歌噬肯輒欲賦歸來未盡傾懷抱何時得好開
但聞池館勝躡屐便衝寒勿念家園闊頓忘雲水寬銜
杯呼耳熱擁髻憶眉攢可識攀留意頽齡聚會難
遙指江村路山梅欲放花海濱舡獨扣湖上酒能賒我
贈無金錯君詩若錦砂憑誰破岑寂別襟感年華

次韻黃海誌別七律

方壺圓嶠大筆題使我畚揭忘親攜蟋蟀在堂客竟去
蟬螭成塞人難齊賓來孤鴻留雪印陂復兩鵠思雲栖

賦別黯然欲迴權倡子和汝歌擇兮

徐慎齋遊擊

成達

邀飲李筍香光祿

筠嘉

吾園三

首

裘帶開華宴林亭遣客懷到門雙鶴嘯倚檻萬竿排臘
味浮苔席春容入舫齋主人清不俗繞屋揭詩牌

吾園吾亦愛種菜閉門高林雪蟠貓簞溪烟養鴨桃帶
鋤輸海嶼荷鋤向江臯絕憶棲遲地蕭疎氣自豪

聞說當春盛桃花千樹多環亭皆綠水消暑更紅荷美
景盡如此勞生將若何還憐老吟客題品徧煙蘿

謂黃海

誤食巴豆

頗喜餌松子幾欲同桂父誰知巴有豆非比蜀之蒟
迥殊果實狀不差索黍入喉厲已烈慘腹格難吐剛腸
遇剛子火攻到瞀瞀三遺困河魚一粒疑漏脯紛然投
刀圭積爾廢樽俎腊肉或遇毒皿蟲乃爲蠱我食求清
高此意異臭腐其柰似而非不審害亦鉅爾雅未熟讀
且爲勸學苦所以餐松脂反令塞胸宇

巡功

是役我爲植曷敢有寧居畫方六十萬鳩衆五萬餘剋
期在歲杪積錢爲儲胥傭直最優厚役徒宜爭趨若非
躬勞徠恐或行趑趄董之以田駿準之以河渠溝通中

水線土棄大路隅時幸寒多霽河雖深不瀦天猶愛民
力官敢忘簡書因之戒僚友勉以慰窮閭顧我實衰朽
且辱在泥塗迴憶廿載前執扑巡淮徐轉瞬迫遲暮鞅
掌猶故吾

黃渡

去年船到千秋橋秋風小泊迎秋潮今年役車涉黃渡
橋頭鄣水橫桔槔去年初度逐川路今年殘臘行隰臯
歲事崢嶸不遑恤土功竭蹶寧辭勞人家桃符欲改戶
予羸老矣猶漂搖因思荷畝數萬衆淖深沒脰泥浸腰
誰解拊循續同挾無煩驅迫鼓頻敲我雖况瘁未沾體

安能安坐圖逍遙
憑陵吳淞老江口
疏鑿湖海通波濤
雨雪載途謳不止
沿隄柳色窺柔條

聞黃海至上海却寄

千里結言無後期
道同嵇呂慰心知
君真騎氣黃山客
我是輿徒絳縣師
料得奚囊吟舊雨
催將役鼓作新陂
回車重把浮邱袂
海上春生柏酒卮

次韻黃海舟抵上海寄和二首

鼓櫂迴颿爲底忙
海山遊興未渠央
踐言候館苔侵榻
振筆吟筒穎脫囊
皓首遠行同度歲
青春作伴好還鄉
句園亭幾處須題詠
準備金荃玉躡襃

顧我偏紆會面期泥塗深恐海鷗知穿渠畚鍤呼閭左
隔岸菰蘆問釣師乘興喜停衝雪舫散懷應指化龍陂
江頭春近梅開未便擬同傾醪滿卮

公館歲除次黃海卻疾詩韻

隔牖兩呻吟一藥一不藥病魔尚可除詩魔安可縛藥
者呻稍衰不藥吟更作自謂鸛鶴呼憐余陰陽薄病如
秦軍來當以談笑卻秦定發天光驅回還寂寞此意通
於詩梅笑巡檐索此義通於道黃庭守金鑰今年江海
濱川塗難閉閣約君千里來雅不趁烜鑠不然迫歲除
誰與嚼復嚼大藥不可求古懽自相樂君言石能生我

亦進謬兩頭俱息聲遊神於大漠

已卯元旦次黃海韻

老友年前特寄聲攜來歲籥爲吾更人逢海上三山客
天放江南一日晴鶴髮盈顛緣百感令原觸緒歎孤生
君家詩力徵耆壽搦管爲文便噉名

黃海是年七十

陳禮園中翰

廷溥

屬題其十二世祖文莊公誨詩

筆因懷中翰弟桂堂太守

廷慶

勝朝璫禍正統始乘輿一擲幾亡矣殿上初呼王先生
厨間解哭薛夫子文莊抗疏嬰其鋒一斤不復歸田里
作詩無怨稱堯民仰事俯育躬耘耔詞翰流傳四百秋

駮烈昭垂十三氏中書鼎季揚清芬諸郎翩翩濟其美
當代耆儒皆品題鯁生何足贊前軌因思哲弟黔安公
真如姻婭無彼此豈期早返兜率天而我今來滬濱壘
相思宿草經年多捧君疏麻如夢裏屬書遺直不敢辭
欲質修文舊太史

壽黃海七十疊前韻二首

壇坫東南舊有聲不知歲月幾回更高談卷幔延秋爽
俊句開軒送晚晴吏隱蕭閒老博士天真爛漫太憨生
刻詩先刻同人集四十年來記姓名

旅窻同聽海潮聲剪燭聯吟欲五更已屆懸車三歲長

頻來艤棹一冬晴
筆如筋力輸君健
座有心交畏客生
但祝春風隨杖履
英游攜手徧題名

滬城元夜

水國風和早試燈
趁潮三五月初升
喧聞街鼓春如海
靜對窻檠酒欲冰
粧點物華由歲稔
料量民力輒宵興
少年心事南溟客
曼衍鯤遊運大鵬

是夜有
龍燈

喜黃海至

闔閭城畔小流連
獨鶴長鳴向海天
若使久懸徐孺榻
會須焚却子猷船
酒經木客供三雅
詩稿山都壓兩肩
未入我門聞大笑
探梅手折一枝先

題黃蕘圖主事

丕烈

祭書圖三首

經當拜手陳詩以勞心祭况邀太乙靈豈爲毋昭齋

物必聚於所好禮貴不忘其初中有太元一部合陪俎

豆精廬

子有朱鈔溫公太元注曾以持贈

何曾食字遇神仙獼祭零星媿簡編欲向長安求福地
豚蹄自笑祝盈廛

題青山澹慮圖用韋蘇州原詩韻

爲黃曾佑行看

夜雨滯客魂披衣見窻曙有友進此圖展讀清俗慮縈
青山近遠繚白雲來去吾未見斯人恍若遊其處知君
坐欲忘笑我行何遽企懷叔度風淵澄比殆庶

遂初園看梅

湘西有老屋梅花三百株林下美人冰玉膚一別二十
有七載素抱可惜田園蕪吳門吾山香雪海近栽桑柘
樹全改其餘園林或巖阿白者漸少紅者多化工亦愛
繁華插晴昊白者開遲紅者早頗如畫筆描臙支又若
文章尚麗藻我思歲寒盟本來面目乃真好登山涉海
以求之幽芳冷淡無人知遂初園中恰相遇水邊竹外
三五十皆瓊枝北枝只數點南枝半欲披人賞南枝
盛我愛北枝遲良朋久要金蘭契志士晚成竹帛垂待
得素葩滿苑著先時浮采漲豔紛紛落疎林感我故園

心洞庭春釀對花酌

嘉定工次遇雪

天公念吳淞五十年未開一朝興此役默佑民子來大
冬至首春晴暖無風霾謂工已垂成軫麥少滋培東風
扇微和宿雨灑積埃春膏既液液快雪復皚皚淺青上
苗葉深白流根茲甘受澤門謳去預祝隴首堆人猶有
所憾天必因其材但毋虧蕢土何必憂汗菜

雪霽春寒二首

狎恩長恃負暄豪畢竟難屯百穀膏釀雪却由和氣轉
試晴翻借烈風牢首春寒日檐猶短肺病衰年枕逾高

閣外催工鳥聲急瑟居何以答民勞

道治神宮一辦熏春陰向曉祝晴雲半龕有席分彌勒

雙榻無羶乞廣文

時顧吳兩學博同寓神祠

功到垂成愁散手疾緣

小愈惜勞筋渠開準備淩江艇鳥語花香兩岸聞

春陰感懷前韻二首

功爲貪天氣太豪故令淹滯雨如膏萬夫川欠稍溝廣
九仞泉須汲綆牢擁戶未能衝淖出醜渠安得建瓴高
浮家咫尺兒孫隔民事難辭櫛沐勞

披衣寒憶覆篝熏忽報桐枝墮曉雲硯室方思詒繼武

玉樓何苦召修文

聞長孫殤於金陵

背人老淚常盈睫悔我修

塗未息筋蕭寺淋浪驚旅夢童烏啼處夜深聞

疊韻訓陸生可泉

曰壽

見和前詩二首

笠澤詩詞興趣豪善言風土切民膏

生有吳淞江雜事詩三百首屬爲序

功從蠹簡刪三豕味在藜羹勝七牢小序豈同元晏重

長篇更比白雲高因知往昔疏江役再世詒謀有舊勞

雍正乾隆年兩次濬江生

曾大父大父曾董其事

我來塞向室初熏轉瞬春融度海雲穿土符籌庚癸計

禱晴帖寫丙丁文魚勞頗爲憂頰尾驥老真應困綠筋

成事因人何足記名山著述荷多聞

生撰重濬吳淞江記

謝可泉餽點心次韻二首

門傳銀鹿有詩差手捧春盤色色佳儉腹自憐蔬筍氣

題饒說餅滿蕭齋

多品芳馨飮坐春粉資分療廣文貧

謂吳雲士回思百番餐

秋菊

生有詠菊七律百首

風味清腴好共論

吳淞江竣紀事十首

浮天震澤入三江疏鑿松江氣自降岷北何關宣巨浸

鄭康成謂三江爲岷江南江北江

婁東久已塞奔瀧

鄧道元謂松江婁江東江爲三江今

婁東皆廢

河分夏駕勞梳刷

婁江今爲劉河易淤

浦漲春申患擊撞

黃大

浦是東江故道

若任經流同息壤難期水利重南邦

禹功定後楚黃君經始長橫渡口雲

黃渡爲黃歇始浚吳松之地

白

蜺雙泓王介甫青龍一曲范希文新豐市改屯兵岸故

道灘裁掠淺軍顧浦吳塘終鮮效海龍謠俗至今聞

明時

童謠要開吳松江須等海龍王後巡撫海瑞推官龍宗武濬治成功

潮挾沙來積漸淤翻教支派溢歸墟霸王豈畏韓彭將

唐時江湖甚猛謂為西楚霸王學士空談郊單書雉竄潮江旁立漢諸功臣祠以厭之

荒墩全作陸崔喧淺瀨不成渠況今東泖兼天湧鼓浪

帆橋駭巨魚

專意虬江重遠圖文襄忠介有成模

三朝大吏并州剪五十餘年合浦珠承

帝曰咨勤相度用民之力樂徵輸出謀發慮由安定已

播風聲徧海隅

謂前中丞胡果泉先生

條教先頒作準繩

詔遷方伯晉中丞

謂今陳雲柯中丞

率錢預絕追胥擾鳩衆無

煩遠地徵傭較河渠三倍直食逢年穀屢豐登擇勞因

利民知信早識公旬鼓弗勝

民功宣力省符催江上扁舟自泝洄得歲恰逢星紀分

通渠不費水衡財隆冬荷鍤隨田畯戒旦鳴鉦召里魁

筋力近衰慙短馭全憑良牧策羣才

謂師禹門刺史

由旬一倍記江郵提闕初枕壤更修古渡懸燈祠沈尹

黃渡城隍神爲明布政使沈公恩

洪濤沉劒拜周侯

康熙松江守周公中鑑以藩江之役

歿於潮

贈太

朕朕不惜泥埋脛櫛沐何辭雪滿頭

僕松人立祠

滬瀆

定議水心先奏績

謂葉萊山大令

大川共濟在同舟

喜遇暄和臘鼓傳初春小雨又晴天天時助順陂當復

人事趨公素不愆畚揭循崖皆大阜溝塍分注有支川

波臣一夜迎旌節千斛揚帆轉漕船

中丞按工啟埭通波漕艘暢行

善溝水漱響潺湲五滙兼通四十灣岙嶺清流歸滬瀆

瀛洲碧浪到崑山潮聲估客來筐篚峯影船娘望髮鬟

見說菰蘆有佳士新詞三百出雲間

黃渡陸生曰壽有吳淞紀事三百首

浙西諸水祭先河好滌來源挹注多啓閉尾閭籌牖堰

從橫枉渚削蘘荷犁鋤春雨飛秧把簫鼓秋風發棹歌

願祝百年長利賴投閒祇合狎鷗波

虎邱後院玉蘭花

已卯

幾載未看玉蘭花今時重到花交加南枝北枝開次第
千朵萬朵紛周遮笑我鬢翁已龐皓愛渠蒂萼尤滂葩
朗朗如行玉山頂森森欲采玉樹芽因攜綠樽一浮白
恰遇紅袖雙傳芭駒光過隙且暮景虬柯閱世長春華
人言花石綱使物偶遺海涌梵王家若令珍禾登良嶽
早隨鐵騎埋龍沙安能浩劫卧岩麓翛然風骨含烟霞
瑤臺璀璨迴雪舞碧漢輪囷貫月槎迺知花木亦有遇
不遇暫時榮遇何須誇此花千年霑甕露曾邀

睿賞迴雲車

雲柯中丞招飲錢氏息園二首

爲政春多暇中丞折簡招園林花幔設賓從柳衙邀新
漲綠侵座芳蹊紅度橋德音喜交暢雅不藉笙簫

別墅增名勝新祠仿表忠草開毬馬路花發錦衣叢到
此塵機息叨陪禮數融習池笑山簡何似坐春風

還養筠謠

客夏築謠門拓地護新筍筍籜未浮筠門垣初填粉官
符星火催役車旦暮引出門顧屢迴別竹念常軫江干
翦蒲芽海畔治蛟蜃安報寄野梅流光捷朝菌往矣榴

火明來思桃浪緊遙瞻連理楸先問出墻菌孫枝歎有
折老幹幸無實本圖小自適經年未能近三湘況遠途
萬个付虛牝美土不如鄉高官不如隱

次韻王簣山同年咏梅四首

手種寒香小閣前年年塵鞅逐風煙難延世外佳人賞
甘受山中處士憐幸不折來吟杜老何當歸去學逋仙
翰君几硯精嚴地靜對幽芳煮石泉

原咏盆梅

流水行雲記歲華冰姿原不著纖瑕鋤烟空谷攜鴉觜
衝雪前溪樣槩牙鏡撚霜髯人易老林橫月魄客無家
可憐嫩蕊難禁冷重覓苔枝影漸差

白梅

百花魁占杏花紅預報君家庭院中

令嗣方應南宮試

筆燦九

英初暎日錦堆千葉正翻風歲寒與竹仍爲友春信先
挑未許同玉樹定符調鼎兆瓊林金帖五雲東

紅梅

頡頏垂玉佩飛霞枝北枝南整復斜粉蝶分翔花鞞鞞

翠禽同宿樹槎牙冰霜氣骨原清客鐵石風流是作家

屈指征鴻傳驛使

君有轉漕之行兼調任江右

酡顏握手說搏沙

承招

飲故 死央梅

圭峰碑帖購於燕市法梧門見而索借約其子得
第爲還期明年其子第矣而帖展轉浮沉十年乃
歸冊尾有梧門寄還詩四首讀之愴然蓋梧門父

子俱歸道山矣追次其韻以志悲感

借帖詩龕已十年米顛當日欲跳船而今雖得珠還浦
一種傷懷翰墨緣

千佛名經捧不難如何玉樹竟彫殘乃翁尚說能成立
進步應愁百尺竿

千里題詩賦遠離可憐石闕口銜碑草元亭廢朋交散
淒絕童烏怛化時

恍如丁令鶴飛來辜負遺書幾度催他日過墟當挂劍
詩牋和就爲誰開

宴尚衣水上衙齋觀水嬰次簣山觀察二首

山嵐橫渚浸斜陽隔岸青旂帶綠楊亭角一奩開鏡影
燈花百琲綴珠光繞洲櫂舞春如海倚檻蘭言月有香
自是衙齋占清敞秦淮煙景供谿堂

列仙曾此汎流霞旗鼓重張興倍賒畫舫爭開環四面
春臺同上樂千家座侔秋半南樓月筆燦波心火樹花
豈類高陽歌茗芋金鞍簇處靜無譁